

Inatsisissatut siunnersuummut oqaaseqaatit

Nalinginnaasumik oqaaseqaatit

1. Aallaqqaasiut

Meeqqanik pinerliisimannginnermut uppernarsaatinik piunasaqaateqartussaataaneq pillugu Inatsisartut inatsisaat nr. 8, 19. maj 2010-meersoq Inatsisartut 2010-mi upernaakkut akuersissutigaa, meeqqanik kinguaassiuutitigut pinerliisarnerup akiorniarnernani suliniutit annertusarnissaat siunertaralugu. Meeqqanik pinerliisimannginnermut uppernarsaatinik piunasaqartussaataaneq pillugu inatsisikkut pinngitsoortinniarnearpoq, inuit taama pinerliisimasutut pillagaasimasut, meeqqanut toqqaannartumik attaveqarfiusinnaasuni atorfininnginnissaat imaluunniit sulisinneqalinninnissaat. Ilutigisaanik inatsisip siunertaraa inuit taakku atorfinnut suliffinnulluunniit toqqaannartumik meeqqanut attuumassuteqarfiusunut atorfininnissamik sulilernissamilluunniit qinnuteqannginnissaasa aqutissiuunnissaa. Inatsisip taamaalilluni aallaavigivaa, inuit kinguaassiuutitigut meeqqanut qaninniartartut meeqqanik paarsisussatut atorfininnginnissaat sulilinninnissaalluunniit, taamaaliornikkullu meeqqanik innarleeqqinnissamut periarfissinneqannginnissaat.

Meeqqanik pinerliisimannginnermut uppernarsaatip pinerluuteqarsimannginnermik uppernarsaat nalinginnaasoq assigisinnaavaa, allaassutigaluguli meeqqanik pinerliisimannginnermut uppernarsaammi meeqqanik 15-it inorlugit ukiulinnik kinguaassiuutitigut pinerliinerit aalajangersimasut kisimik pineqarmata, aamma meeqqanik pinerliisimaneq pillugu paasissutissat uppernarsaammi, pinerluuteqarsimannginnermut nalinginnaasumik uppernarsaammut sanilliullugit piffissami sivilisinerusumi ersittussaammata. Naalagaaffiimi Oqartussaasut Inatsisip Atuutsitsinnermut Ministeriaqarfik aqutigalugu Pinerluuteqarsimasut qitiusumik nalunaarsorsimaffiat pillugu nalunaarut atuuttoq aqutigalugu meeqqanik pinerliisimannginnermut uppernarsaatip erseqqinnerusumik nassuiaasernissaa ilusissaalu aalajangertarpaat.

Siunnersuutip matuma siunertaraa meeqqanik pinerliisimannginnermut uppernarsaatip atuuffiata annertusinissaa, taamaaliornikkullu kinguaassiuutitigut meeqqanik pinerliisarneq akiorniarlugu suliniuteqarnerit annertusarnissaannut tunngavissiiinissaq.

Meeqqanik pinerliisimannginnermut uppernarsaassiiinissaq pillugu inatsisip atuutilernerata kingorna, danskit inatsisaat tassunga assingusoq sulisunik atorfinitsitsinnermi il.il. meeqqanik pinerliisimannginnermut uppernarsaammut tunngasoq allannguutinik ilassuserneqarpoq, inatsisip atuuffia annertunerulersillugu. Tamatumani sallerpaatillugu pineqarpoq Pinerluuteqarsimasunik Qitiusumik nalunaarsuiffimmi inuit pillugit paasissutissat sularineqartarnerat pillugu nalunaarutip nr. 218-ip, 27. marts 2001-imeersup § 36-anik nutaamik oqaasertaliineq. Tamanna nalunaarut nr. 507, 31. maj 2012-imeersoq aqutigalugu

allanngortinneqarpoq. Aammattaaq Pinerluuteqarsimasut qitiusumik nalunaarsorneqartarfianni inunnik paasissutissat suliarineqartarnerat pillugit nalunaarut nutaaq atuutileqqammerpoq, tassaasoq nalunaarut nr. 881, 4. juli 2014-imeersoq, 1. august 2014 atuutilersoq. Nalunaarutip taarserpaa nalunaarut nr. 218, 27. marts 2001-meersoq taassumalu kingusinnerusukkut allannguutai. Pinerluuteqarsimasut qitiusumik nalunaarsortarnerat pillugu nalunaarummi maanna ersippoq, ullumikkut ajornanngitsoq, inuit atorfinitsitaanerminnut sulilersitaanerminnulluunniit atatillugu meeqqanik 15-it inorlugit ukiulinnik toqqaannartumik attuumassuteqartussat kisiisa meeqqanik pinerliisimannginnerinik uppernarsaateqartinnagit aammali inuit suliaminnut atatillugu meeqqat 15-it inorlugit ukiullit akornanniittartut, taamaalillutillu meeqqanut toqqaannartumik attaveqarnissaminnut periarfissaqartut aammattaaq meeqqanik pinerliisimannginnerminnik uppernarsaatinneqarnissaat. Taakku saniatigut malittarisassat ilaneqarput, maanna aammattaaq ajornarunnaarluni inuit atorfimminnut suliaminnulluunniit atatillugu meeqqanut 15-it inorlugit ukiulinnut toqqaannartumik attaveqartut illoqataasa meeqqanik pinerliisimannginnermut uppernarsaateqarnissaat. Ilutigisaanik aamma meeqqanik pinerliisimannginnermut uppernarsaat piniarneqarsinnaavoq inuit sulinerminnut atatillugu meeqqat 15-it inorlugit ukiullit akornanniittartut illoqataannut atatillugu, taakku meeqqanik toqqaannartumik attaveqarnissaminnut periarfissaqarpata. Allannguutit tamakku Kalaallit Nunaanni inatsisinut ilanngunneqarnikuunngillat, tassami meeqqanik pinerliisimannginnermut uppernarsaateqartarnek pillugu inatsit suliarineqarpoq, Pinerluuteqarsimasut qitiusumik nalunaarsortarnerat pillugu nalunaarummi taamanikkut atuuttumi § 36-mi oqaasertaasut naapertorlugit.

Inatsisip maanna atuuttup siunnersuutigeqqaarnerani tusarniaassutigineqartumi siunnersuutigineqaraluarpoq, ilaqutariinnut inissiinnermut il.il. meeqqanillu 15-it inorlugit ukiulinnik paarsinnermut atatillugu, illoqatigiit 18-it qaangerlugit ukiullit paarsisuusup najugaani najugaqartut tamarmik meeqqanik pinerliisimannginnermut uppernarsaateqassasut. Kisianni aalajangersagaq peerneqarpoq, tusarniaanermi Naalagaaffiup politiivisa tikkuarmassuk, Pinerluuteqarsimasut qitiusumik nalunaarsortarnerat pillugu nalunaarummi paarsisuusup avataatigut uppernarsaasiinissaq inatsisitigut tunngavissaqanngitsoq. Tamatumunnga pissutaavoq assersuutigalugu ilaqutaasut atorfinitsitaanerminnut sulilersitaanerminnulluunniit tunngatillugu meeqqanut toqqaannartumik attaveqartannginnerat. Siuliani eqqaaneqartutut Pinerluuteqarsimasunik qitiusumik nalunaarsuisarneq pillugu nalunaarut maanna allanngortinneqarpoq.

Taamaammat inatsisissatut siunnersuut manna aqutigalugu inatsisip atuuffiata annertusinissaa periarfissaqalerpoq, Danmarkimi meeqqanik pinerliisimannginnermut uppernarsaasiisarnermik aqqissuussinnermut assingulersillugu. Tassunga ilassutitut oqaatigineqassaaq, meeqqat nunami maani taamatut immikkut illersugaanissaannut pissutsinik akerliusunik soqanngimmat.

Aammattaaq oqaatigineqassaaq Inatsisunik Atuutsitsinnermut Ministeeriaqarfiup 18. november

2013-imi allakkatigut, Namminersorlutik Oqartussanit saaffiginnissut akimmagu, meeqqanik pinerliisimannginnermut uppersaartip allatut annertusinissaanik kissaateqarneq pillugu saaffiginnissutaasoq. Tamatumani pineqarpoq inuit inuusuttunik 15-17-inik ukiulinnik suliaqartussat pinerliisimannginnermut uppersaateqartinneqarsinnaanerit pillugu apeqqut. (Namminersorlutik Oqartussat saaffiginnissutaannut aallaaviuvoq, tamanna pillugu Inatsisartut aalajangiiffigisassatut siunnersuummik akuersissuteqarnerat, UKA2010/66-ip oqallisigerani). Inatsisunik Atuutsitsinnermut Ministeeriaqarfiup akissummini tunngaviliuppa, meeqqanik pinerliisimannginnermut uppersaartip atuuffianik annertunerusungortitsineq, inuit, atorfimminnut suliffimminnulluunniit atatillugu inuusuttunut 15-17-inut ukiulinnut toqqaannartumik attuumassuteqartussat ilaalersillugit, maanna aaqqissuussinerup erseqqinnerusumik ilusiligaanerani innimigineqartunik sanioqqutitsinerussasoq. Taamaammatt Naalagaaffimmi Oqartussaasut taamatut Kalaallit Nunaannut immikkut atuuttussamik annertusaajumangillat. Tassunga ilassutitut erseqqissarneqarpoq, pineqartoq tassaammatt inuit kinguaassiuutitigut meeqqanut kanngunartuliortartut (pædofile) meeqqanik paarisartillutik atorfimminnik suliffimminnulluunniit atornerluillutik meeqqanik kinguaassiuutitigut atornerlueqqinnginnissaat pinngitsoortinniarlugu atorfinitsinneqannginnissaat sulilersinneqannginnissaalluunniit. Meeqqanik pinerliisimannginnermik uppersaateqartitsilluni aaqqissuussineq taamaalilluni taamaallaat meeqqanut kanngunartuliortartunut (pædofile) tunngavoq, kinguaassiuutitigut pinerlunnerit allat pineqaratik. Meeqqanik pinerliisimannginnermut uppersaasiineq Naalagaaffimmi oqartussaasut ataaniimmat, Naalakkersuisut Inatsisunik Atuutsitsinnermut Ministeeriaqarfiup akissutaa tusaatissatut tiguaat.

Tassunga ilassutitut oqaatigineqassaaq meeqqanik pinerliisimannginnermut uppersaatinik atuinermut sallerpaatillugu tunngaviummat, isumaqartoqarmat meeqqanut kanngunartuliortartut meeqqanut immikkut ulorianartuassasut, pineqartut siusinnerusukkut meeqqanik pinerliisimanertik pillagaassutigisimagaluarpassulluunniit. Taamaalilluni taamatut isummernermit qanoq ilimasuttoqarsinnaanerani tunngavik aallaaviuvoq, pinaveersaartitsinissamik siunertaqartoq. Taamaalilluni meeqqanik pinerliisimannginnermut uppersaartit ilusilernerannut tunngavivoq, isumaqartoqarmat meeqqanut kanngunartuliorsimasutut pillagaasimasut pillagaareernermit kingorna meeqqanut suli ulorianarsinnaasut. Taamaalilluni meeqqanik pinerliisimannginnermut uppersaartit atuuffiisa annertusinissaannik siunnersuut manna, pinerleeqqittoqarsinnaanera pillugu eqqarsaatinik qulaani pineqartut assinginik aallaaveqarpoq.

Aammattaaq ilutigisaanik erseqqissarneqassaaq, meeqqanut inuusuttunullu tunngasuni atorfinitsitsisartutut oqartussaasut, peqatigiiffiit il.il. namminerisamik pinerluuteqarsimannginnermut uppersaammik piniarsinnaatitaareermata, taamatullu pisortaqarfiit pisortatigoortumik pinerluuteqarsimannginnermut uppersaammik piniarsinnaatitaareerlutik. Tassunga atatillugu oqaatigineqassaaq pinerluuteqarsimannginnermut uppersaartit, meeqqanik pinerliisimannginnermut

uppernarsaatit akerliannik - taakkumi taamaallaat meeqqanut kanngunartuliorsimasunut tunngapput – pinerlutsaalisitsineq pillaaernerlu pillugit inatsisinik unioqquitsisimanernik tamanik imaqtarmata, taakkununga ilanngullugit tillinniarsimanerit nakuusersimanagerillu, pillagaanermut tunngaviusut immikkut erseqqissanngikkaluarlugit. Assersuutigalugu imerniartarfimmi kamaannermut peqataasimasutut pillagaasimaneq taamaallaat ”nakuusersimaneq pillugu pillagaasimasutut” ersissaaq. Taamaalilluni qularnanngilaq, paasissutissat inuusuttunik suliqaarnissamut attuumassuteqanngikkaluartut ingerlateqqinneqartassasut. Kisianni oqaatigineqareersinnaanngilaq paasissutissat pineqartut sulilernissamut tunngatillugu kinguneqartinneqassanngitsut, paasissutissat inuusuttunik kinguaassiuutitigut pinerliisinnaanermut naleqqiullugu pingaaruteqanngikkaluarpataluunniit, tassami atorfinitsitsisartut pilerinartinnerussavaat, siusinnerusukkut pillagaasimanngitsumik atorfinitsitsinissartik, inatsisinik unioqquitsisimaneq sunaagaluarpalluunniit qanorluunniillu nassuiaatissaqartinneqaralarpat. Tamatumunnga atatillugu inuup siusinnerusukkut tillissimasup nakuusersimasulluunniit tatiginissaa ajornakusoorsinnaavoq, tamannalu immikkut ajornartorsiummik nassataqarsinnaavoq, suliffissaqartitsiffiit inunnik inuiaqatigiinnut peqataateqqilernissaannik suliniuteqarsinnaanerannut naleqqiullugu. Tamatumani pissutaavoq pinerluuteqarsimannginnermut uppernarsaatit pissusiviusut naapertorlugit nassatarisarmassuk inuit pinerluuteqarsimasut allanut naleqqiullugit suliffissarsioruminaatsitsinerusarnerat, taamaalillunilu uppernarsaateqarneq inunnit taakkununga qavaatigut pineqaatissiissutitut misigineqartarluni. Ajornartorsiutit taakku meeqqanik pinerliisimannginnermut uppernarsaatit aqutugalugit pinaveersaarneqarput, tassami taakku taamaallaat pinerluutinut meeqqanut attuumassuteqartunut tunngasuummata aamma taamaallaat atorfiit suliffiilluunniit toqqaannartumik meeqqanut attuumassuteqarfiusussat kisimik pineqarlutik.

Meeqqanik pinerliisimannginnermut uppernarsaatini taamaallaat pisortanit aalajangiinerit, soorlu eqqartuussaasimanagerit pineqarput. Taamaammat meeqqanik pinerliisimannginnermut uppernarsaatit suliniutinik allanik tapertaqartillugit atorineqarnissaat pisariaqartuassaaq. Taakkununga ilaasinnaapput pissusilersornissamut qanorlu attaveqatigiittarnissamut malittarisassat, meeqqanik inuusuttunillu sullissinermi pissuserissaarnikkut tunngavissanik pilersitsineq, paasissutissiinerit oqaloqatigiinnerillu, sillimanissaq pillugu pilersaarutaajunnartut oqallisiginerat aamma atorfinitsitsinermi periutsit annertunerusumik isiginiarnerat, soorlu suliffigisimasanit paasissutissanik oqaaseqaatinillu piniarnermut naleqqiullugu.

2. Inatsisissatut siunnersuummi pingaarnerit

a) Inatsisit atuuttut

Inatsit atuuttoq tassaavoq Meeqqanik pinerliisimannginnermut uppernarsaatinik piunasaqaateqartussaataaneq pillugu Inatsisartut inatsisaat nr. 8, 19. maj 2010-meersoq. Inatsimmi piunasaqaataavoq pisortat, suliffeqarfiit, peqatigiiffiit il.il. taakkununga ilaallutik inuttaasut aamma inatsisitigut inuttaasut, inunnik suliassaminnut atatillugu meeqqanut 15-it

inorlugit ukiulinnut toqqaannartumik attaveqartartussanik atorfinitsitsinnginnerminni sulilersitsinnginnerminniluunniit Naalagaaffiup Politiivinit meeqqanik pinerliisimannnginnermut uppersaammik piniartassasut.

Inatsisip atuuttup nassataraa suliffeqarfiit, peqatigiiffiit il.il. meeqqanut attuumassuteqartut atorfeqartut sulisulluunniit pillugit pisariaqartunik ilisimasaqalernissaat, meeqqanut inuusuttunullu kinguaassiuutitigut pinerliisoqarnissaata pinaveersaartinnissaa qularnaarumallugu. Inatsimmi inuit meeqqanik pinerliisimannnginnermut uppersaammik pillagaasimasut nalunaarsorneqartut atorfinitsinneqannginnissaat sulilersinneqannginnissaalluunniit toqqaannartumik inertequtiginneqanngilaq, taamaallaalli paasisaqarluarsimalluni aalajangiinissaaq tunngavissinneqarluni. Taamaattoq suliffiit, peqatigiiffiit il.il. inatsimmi taaneqartut, inatsit naapertorlugu meeqqanik pinerliisimannnginnermut uppersaammik piniangitsoortut akiliisitaasinnaapput.

Inatsisip inunnik pineqartunik killiliinera, suliffeqarfinnut, peqatigiiffinnut il.il. meeqqanik 15-it inorlugit ukiulinnik ataavartumik ilaannikkulluunniit orninneqartartunut tunngavoq. Assersuutigalugu taaneqarsinnaapput meeqqat atuarfianni ilinniartitsisut, meeqqerivinni sunngiffimmilu klubbini perorsaasut assigisaallu, isumassuilluni isumaginninnermillu suliaqarnermi angerlarsimaffimminni paarsisartut, angajoqqaarsiaasartut il.il., ilagiinni palasit ajoqillu, timersoqatigiiffinni timersornermik ilitersuisartut, spejderini aqutsisut, Dronning Ingridip Napparsimavissuani meeqqanut immikkoortortaqaarfimmi sulisut, kommunini peqatigiiffinni il.il. pinngortitaq pillugu ilitersuisartut. Tassunga atatillugu apeqqutaanngilaq atorfinitsitsisoqarnermoq imaluunniit soorlu taartaasut sulisoqarallarnersoq, piffissami aalajangersimasumi sulisoqarnermoq imaluunniit sungiusarluni sulisoqarnermoq. Killiliinermi tunngavisoq tassaavoq, atorfik suliarluunniit meeqqanut 15-it inorlugit ukiulinnut toqqaannartumik attaveqarnissamut periarfissaqalernermik nassataqarnermoq, ima paasillugu atorfik suliffilluunniit aqutugalugit meeqqanut 15-it inorlugit ukiulinnut qanimut, nakkutigineqanngitsumillu attaveqarnissaaq periarfissaqarnermoq. Tamatumani annermik pineqarluni attaveqarneq meeqqap inersimasullu akornanni tatigeqatigiinnermik pilersitsisinnaasoq, aamma sivikitsumik ataasiaannarlunilu attaveqarnerunngitsaq.

Piomasaaqatip maanna atuuttup, tassalu atorfininnerup sulilernerulluunniit meeqqanut 15-it inorlugit ukiulinnut toqqaannartumik attaveqarnernissamik piomasaaqatip, nassataraa, inuit suliaminnut atatillugu meeqqanut 15-it inorlugit ukiulinnut toqqaannartumik attaveqanngikkaluarlutik meeqqanik tikinneqartartuniittartut, meeqqanik pinerliisimannnginnermut uppersaateqartussat avataanniimmata. Taamaalilluni inatsit atuuttoq naapertorlugu inuit pineqartut meeqqanik pinerliisimannnginnermut uppersaammik piniunneqartussaannngillat, naak meeqqat 15-it inorlugit ukiullit ornittagaanniittarlualutik, tamannalu pissutigalugu meeqqanik ilisarisanearlutik, taamaalillutillu meeqqanik tatigineqalersinnaallutik - meeqqanik sullissisussaannngikkaluarunilluunniit .

Tamatuma saniatigut oqaatigineqassaaq inatsisip piumasarinngimmagu atorfeqarneq suliaqarnerluunniit akissarsissutaasassasoq imaluunniit ingerlassaq arlaatigut ajunngitsorsiasaqartinneqassasoq. Taamaammat inuit namminneq piumassutsiminnik suliaqartut aamma meeqqanik pinerliisimanginnermut uppersaateqartinneqassapput. Taamaalilluni killiliinermi aallaaviuvoq, sulinerup akissarsiaqaataanera akissarsiaqaataanginneraluunniit imaluunniit atorfeqarneq sulinerluunniit sivikinnerunersoq sivilinerunersorluunniit apeqqutaatinneqassanngitsut – sivikitsuararsuarmik suliaqarneq eqqaassanngikkaanni. Kisianni inatsimmi atuuttumi piumasaavoq, inuk pineqartoq atorfinitsitsisumut sulisitsisumulluunniit aalajangersimasumik attuumassuteqassasoq, soorlu pisortaqarfimmut, suliffeqarfimmut, peqatigiiffimmut il.il.

b) Siunnersuut

Siunnersuutip inatsisit atuuttut allanngornissaat siunertarinngilaa, taamaallaalli inuit meeqqanik pinerliisimanginnermut uppersaatinik ullumikkut piniunneqartussat killingisa annertusinissaat siunertaralugu, qularnaarumallugu atorfiit suliffilluunniit naapertuuttut tamarmik meeqqanik pinerliisimanginnermut uppersaateqartitsisarnermut ilaanissaat.

Siunnersuutip nassataraa siunissami inuit meeqqanut 15-it inorlugit ukiulinnut toqqaannartumik attaveqartussat kisiisa pinnagit aammali inuit atorfimminni suliffimminniluunniit suliainnut atatillugu meeqqat 15-it inorlugit ukullit akornanniittartut meeqqanik pinerliisimanginnermut uppersaammik piniunneqartalernissaat.

Taamaalilluni inuit pineqartut amerlisinneqarput, inuit meeqqanik sullissinissaq siunertaralugu atorfinitsinneqartut saniatigut aammattaaq inuit atorfimminni sulinerminniluunniit meeqqanut 15-it inorlugit ukiulinnut toqqaannartumik attaveqarnissaminut periarfissaqartut ilaaterlugit. Matumani meeqqanik ulorianartorsiortitsisinnaaneq atorfimmut suliffimmulluunniit imminermut tunngasuunngilaq, kisiannili sumiiffinnut suliffiusunut tunngalluni. Assersuutigalugu tassaasinnaavoq igasoq meeqqanik suliaqartussat atorfinitsitaanngitsaq, kisiannili suliffimmi meeqqat 15-it inorlugit ukiullit ornittagaanni igaffimmi sulisoq.

Allatut oqaatigalugu siunnersuutip nassataraa, siunissami inuit sulinerminni toqqaannartumik meeqqanut 15-it inorlugit ukiulinnut attaveqartanngikkaluarlutik, suliainnut atatillugu meeqqat ornittagaanniittartut meeqqanik pinerliisimanginnermut uppersaammik piniunneqartalissammata.

Ilutigisaanik oqaatigineqassaaq oqartussat, suliffeqarfiit, atuarfiit, peqatigiiffiit il.il. pineqartut annertuutigut tassaammata Inatsisartut inatsisaanni atuuttumi meeqqanik pinerliisimanginnermut uppersaatinik piniartussaataasutut pineqartut. Assigiinngissutaasoq taamaalilluni inuit ilaatinneqartut amerlinerannut tunngavoq, taamaalillunilu inuit oqartussani, suliffinni, atuarfinni, peqatigiiffinni il.il. atorfeqartut suliffeqartulluunniit, toqqaannartumilli meeqqanik 15-it inorlugit ukiulinnik

attaveqartartussaangitsut siunnersuut malillugu meeqqanik pinerliisimannginnermut uppersaateqartussanut ilaalerput. Oqaatigineqartutut tamatumunnga pissutaavoq suliffiit, peqatigiiffiit il.il. pineqartut meeqqanik orninneqartarnerat, taamaammallu atorfilik sulisorluunniit tamanna aqqutigalugu meeqqanut toqqaannartumik attaveqarsinnaalluni. Aammattaarli oqaatigineqassaaq meeqqanik pinerliisimannginnermut uppersaateqartut annertusineratigut, suliffeqarfiit inatsisip taasaasa killilimmik amerlineqarnissaat pisariaqalermat. Taamaalilluni katersugaasiviit aamma Nunatta Atuagaateqarfia ilanngunneqassasut maanna siunnersuutaavoq, tamatumunnga pissutaavoq suliffiit taakku meeqqat 15-it inorlugit ukiullit atuisutut orniguttussatullu saaffigisarmatigut.

Meeqqanik pinerliisimannginnermut uppersaateqartut piniarnissaq pineqartoq aatsaat meeqqanik kisimeeqateqartartussaateqartut atuutinngilaq. Inatsimmi atuuttumi aammattaq taamaappoq. Taamaammatt assersuutigalugu timersoqatigiiffimmi meeqqat ataatsimoortillugit sungiusaasartoq meeqqanik pinerliisimannginnermut uppersaateqartut piniunneqartussaavoq. Aamma meeqqanik paarsisussatut inissisimanissaq piumasqaataannngilaq, tassami aamma oqaatigineqartutut katersugaasivinni aamma atuakkanik atorniartarfinni, meeqqanik akuttunngitsumik orninneqartartuni atorfillit sulisulluunniit meeqqanik pinerliisimannginnermut uppersaateqartussapput.

Inuit pineqartut annertusineranni tunngavilersuutit aallaavigalugit, aammattaq ilaassapput inuit assersuutigalugu angerlarsimafimmi paarsisartuni angajoqqaarsiaasartunilu najugallit, tamannalu aqqutigalugu meeqqanut 15-it inorlugit ukiulinnut toqqaannartumik attaveqalersinnaasut.

Tassunga atatillugu oqaatigineqassaaq inatsisissatut siunnersuummi meeqqanik pinerliisimannginnermut uppersaateqartussat annertusinerata nassatarinngimmagu atorfeqarnerit maanna pioreersut ilatinnissaat, taamaaliornerummi maanna atorfinitsitaanikkut pisinnaatitaaffioreersut allannngortittariaqarnerat nassatarissammagu. Inatsisip atuuttup akuersissutiginerani aammattaq tamanna atuuppoq.

Saniatigutaaq ilanngunneqassaaq, ullumikkut pissusiusut ingerlateqqiinnarlugit, meeqqanik pinerliisimannginnermut uppersaateqartut aatsaat piniarneqarsinnaammat, taamaaliorortoqarnissaanik pineqartoq allakkatigut akuersissuteqarsimappat.

Inatsisissatut siunnersuut inatsimmut atuuttumut sanilliullugu	
	§ 1
	Meeqqanik pinerliisimannginnermut uppersaateqartut piumasqaateqartussaateqartut pillugu

	Inatsisartut inatsisaanni nr. 8, 19. maj 2010-meersumi makku allanngortinneqarput:
<p>§ 1. Inatsisartut inatsisaat manna atuuppoq pisortat ingerlatsinermi oqartussaaffiunut tamanut aamma namminersortunut, inunnut aamma inatsisitigut inuttaasunut atorfinitsitaanermut atatillugu aamma inunnut sulisorineqartunut, atorfeqarnerminnut sulinerminnulluunniit ilaatillugu meeqqanik 15-it inorlugit ukiulinnik toqqaannartumik attaveqartartunut, tak. § 3.</p>	<p>1. § 1 ima oqaasertaqassaaq: ”§ 1. Inatsisartut inatsisaat manna atuuppoq pisortat ingerlatsinikkut oqartussaaffiisa tamarmik, aamma inuit inatsisitigullu inuttaasut, inunnik suliamik suliarineranni meeqqanut 15-it inorlugit ukiulinnut toqqaannartumik attaveqartartussanik atorfinitsitsineranni sulilersitsineranniluunniit, aamma inunnut sulinerminnut atatillugu meeqqat 15-it inorlugit ukiullit aalajangersimasumik akornanniittartunut, taamaalillutillu meeqqanut taakkununga toqqaannartumik attaveqarsinnaasunut, tak. § 3.”</p>
<p>§ 2. Inatsisartut inatsisaat manna naapertorlugu meeqqanik pinerliisimannginermut uppersaat paasineqassaaq tassaasoq Pinerluuteqarsimasunik Qitiusumik Nalunaarsuiffimmiit paasissutissat, inuit atorfininnerminnut sulilernerminnulluunniit ilaatillugu meeqqanik 15-it inorlugit ukiulinnik toqqaannartumik attaveqartartussat atorfinitsinnissaannut sulilersinnissaannulluunniit atatillugu, piumasarineqarnerata kingorna Naalagaaffiup Politiivinit ingerlateqqinneqarsinnaasoq.</p>	<p>2. § 2, imm. 1, naggat siulleg ima oqaasertaqassaaq: ”Inatsisartut inatsisaat manna naapertorlugu meeqqanik pinerliisimannginermut uppersaatit paasineqassapput tassaasut Pinerluuteqarsimasunik Qitiusumik Nalunaarsuiffimmiit paasissutissat, inuit suliamik suliarinerannut ilaatillugu meeqqanut 15-it inorlugit ukiulinnut toqqaannartumik attaveqartartussat atorfinitsinnissaannut sulilersinnissaannulluunniit atatillugu imaluunniit sulinerminnut atatillugu meeqqat 15-it inorlugit ukiullit aalajangersimasumik akornanniittartunut, taamaalillutillu taakkununga toqqaannartumik attaveqarsinnaasunut atatillugu, piumasarineqarnerata kingorna Naalagaaffiup Politiivinit ingerlateqqinneqarsinnaasut.”</p>
<p>§ 3. Pisortaqarfiit, suliffeqarfiit, atuarfiit peqatigiiffiillu makku meeqqanik pinerliisiman-nginnermut uppersaatinik piniartussaataapput, tak. § 2, inuit pisortatut, assistentit, ilinniartitsisutut, atuartitsisutut, perorsaasutut, perorsaasunut ikiortitut,</p>	<p>3. § 3, imm. 1-imi, oqaaseqatigiinni siullerni ”ilinniartitsisutut” kingorna ilanngunneqassaaq: ”atuakkanik atorniartitsisartutut”.</p>

<p>klubbini perorsaasutut, angerlarsimaffimmi paarsisartutut, plejeritut angerlarsimaffimmi paarsisuni perorsaasutut, angajoqqaarsiatut, barne- og socialhjælperitut, isumaginninnermi siunnersortitut, paarsisutut, pedelitut, pedelinut ikiortitut, nakorsatut, juumuutut, peqqissaasutut, sundhedsassistentitut, sundhedsmedhjælperitut, timimik sungiusaasutut, pillorissaasutut, napparsimasunik ikiortitut, portøritut, igaffimmi kantiinanilu sulisutut, eqqiaasutut, psykologitut, tale/hørepædagogitut, tapertaalluni perorsaasutut, ilitsersuisutut, tassunga ilanngullugit pinngortitaq pillugu ilitsersuisutut, ilinniarluni sulinermik sungiusartutut, allaffissornikkut sulisutut, nalunermik ilinniartitsisutut, naluttarfinni sungiusaasutut sulisutullu aamma atorfinni pineqartuni taartaasutut atorfinitsinneqassatillugit sulisinneqassatillugilluunniit:</p>	
<p>1) Kommunalbestyrelsi meeqqat atuarfiinut, kommunimi ulloq-unnuarlu suliffeqarfinnut, kommunimi ulluunerani neqeroorutinut, kommunimi meeqqanut 15-it inorlugit ukiulinnut sunngiffimmi klubbinilu neqeroorutinut oqartussaasutut aamma meeqqanut suli atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut peqqussutaat naapertorlugu angerlarsimaffimmi namminersorlutik paarsisartunik akuersinerminnut atatillugu aamma meeqqanik 15-it inorlugit ukiulinnik nalinginnaasumik angajoqqaarsianut, tassanngaannartumik angajoqqaarsiaasartunut, inuutissarsiutigalugu angajoqqaarsianut aamma ilaqutariinnik oqilisaasunut inissiinninnermi.</p>	<p>4. § 3, imm. 1, nr. 1-imi ”meeqqat atuarfiinut” kingorna ilanngunneqassaaq: ”kommunimi atuakkanik atorniartarfinnut”.</p>
<p>2) Naalackersuisut, napparsimavinnut, Dronning Ingridip Napparsimavia</p>	<p>5. § 3, imm. 1, nr. 2, ima oqaasertalerneqassaaq:</p>

<p>ilanngullugu, Namminersorlutik Oqartussat ulloq-unnuarlu, innarluutilinnut tunngasut ilanngullugit, suliffeqarfiinut oqartussaasutut.</p>	<p>”2) Naalakkersuisut, napparsimavinnut oqartussaasutut, uku ilanngullugit: Dronning Ingridip Napparsimavia, Namminersorlutik Oqartussat ulloq-unnuarlu paaqqinnittarfiutaat, innarluutilinnik paaqqinnittarfiit ilanngullugit, katersugaasiviit aamma Nunatta Atuagaateqarfia.”</p>
<p><i>Imm. 4.</i> Imm. 1-3 naapertorlugit meeqqanik pinerliisimannginnermut uppersaatinik piniarnissamat pisussaaffik taamaallaat atuuppoq inunnut atorfininnerminnut sulilernerminnulluunniit atatillugu pisortaqarfimmut, suliffeqarfimmut, atuarfimmut peqatigiiffimnulluunniit aalajangersimasumik attuumassuteqalersunut. Aalajangersimasumik attuumassuteqarneq paasineqassaaq tassaasoq, atorfininnermiit imaluunniit sulilernermiit inuup attuumassuteqarnera ataasiaannarnerunanilu sivikitsuinnaanngitsoq. Taama pisoqartillugu meeqqanik pinerliisimannginnermut uppersaateqarnissaat, taamatullu kommunip aaqqissugaanik namminersortutulluunniit angerlarsimaffimmi paarsisartunut, paarsineq paarsisuusup angerlarsimaffiani pigaangat, aammattaaq nuuttoqarnerani.”</p> <p>Tamatuma kingorna imm. 4-6 tassaalissapput imm. 5-7.</p>	<p>6. § 3-imi, immikkoortutut nutaatut ilanngunneqassaaq: <i>”Imm. 4.</i> Kommunalbestyrelsip meeqqanik 15-it inorlugit ukiulinnik nalinginnaasumik angajoqqaarsianut, tassanngaannartumik angajoqqaarsiaasartunut, inuusutissarsiuutigalugu angajoqqaarsiaasartunut aamma ilaqutariinnik oqilisaasunut inissiinernut atatillugu qularnaassavaa, angajoqqaarsiat imaluunniit ilaqutariinnik oqilisaasut illoqataasa 15-it sinnerlugit ukiullit tamarmik meeqqanik pinerliisimannginnermik uppersaateqarnissaat, taamatullu kommunip aaqqissugaanik namminersortutulluunniit angerlarsimaffimmi paarsisartunut, paarsineq paarsisuusup angerlarsimaffiani pigaangat, aammattaaq nuuttoqarnerani.”</p> <p>Tamatuma kingorna imm. 4-6 tassaalissapput imm. 5-7.</p>

<p><i>Imm. 5.</i> Imm. 1-3-mi pineqartutut inuk pisortaqarfiup, suliffeqarfiup, atuarfiup, peqatigiiffiup il.il. ataatsip iluani atorfirmut suliffimmulluunniit allamut nuuppat meeqqanik pinerliisimanginnermut uppersaat piniarneqaqqittariaqanngilaq. Assinganik atuuppoq pineqartoq atorfinitsitaaqqippat sulilerseqqitaappalluunniit, pisortaqarfimmu, atuarfirmut, suliffeqarfimmu, peqatigiiffimmu il.il. attuumassuteqarunnaarallarnera pissusissamisuginnartumik sulinngikkallarnermik peqquteqarpat, assersuutigalugu ukiumit atuarfiusumiit tullianut ikaarsaarnermi imaluunniit piffissami aalajangersimasuni sulinermiit tullianut ikaarsaarnermi.</p> <p><i>Imm.6.</i> Naalakkersuisut meeqqanik pinerliisimanginnermut uppersaatini pisarsiniartarneq pillugu malittarisassaliorsinnaapput, tassunga ilanngullugu nakkutilliineq pillugu, aamma aalajangersinnaavaat, meeqqanik pinerliisimanginnermut uppersaatini pisarsiniartarnermut aammattaaq atorfillit sulisullu imm. 1-3 taaneqartut avataanniittut ilaatinneqassasut.</p>	
	<p style="text-align: center;">§ 2</p> <p>Inatsisartut inatsisaat atuutilerpoq 1. august 2015, atuuffigalugillu 1. august 2015-imiit atorfinitsitsinerit sulilersitsinerillu.</p> <p><i>Imm. 2.</i> § 1, nr. 6 atuuppoq angajoqqaarsiaqartitsinernut Inatsisartut inatsisaata atuutilernerata kingorna pilersinneqartunut.</p> <p>Angajoqqaarsiaqartitsinernut Inatsisartut inatsisaata atuutilernera sioqqullugu pilersinneqarsimasunut, § 1, nr. 6 atuutissaaq, inunnu Inatsisartut inatsisaata atuutilernerata kingorna illoqatigiinnut</p>

3. Pisortanut aningaasaqarnikkut allaffissornikkullu kingunerisassai

Meeqqanik pinerliisimanginnermut uppersaammik piniarneq akeqanngilaq. Saniatigut inuit atorfirminni sulinerminniluunniit meeqqanik orninneqartartuniittartut meeqqanik pinerliisimanginnerinik uppersaatit taamaallaat nutaanik atorfinitsitsinernut sulilersitsinernulluunniit atuutissapput. Taamaappaataaq inunnut 15-it sinnerlugit ukiulinnut assersuutigalugu angerlarsimaffimmi paarsisartup najugaqataanut atatillugu.

Taamaattoq siunnersuut Namminersorlutik Oqartussanut kommuninullu aningaasaqarnikkut allaffissornikkullu ilaatigut kinguneqartussatut nalilerneqarpoq. Tamatumani pineqarput piffissaq suliffik nassiussinermullu akiliutit. Tassunga ilaatillugu oqaatigineqassaaq meeqqanik pinerliisimanginnermut uppersaateqartitsisarneq maanna atuuttoq naatsorsuutigineqarmat ukiumut 12.000 kr-nik aningaasartuutaasartoq. Tassunga atatillugu siunnersuutip aningaasatigut kinguneriumaagaasa aningaasat taakku qaangissagaat naatsorsuutigineqanngilaq. Aamma oqaatigineqassaaq meeqqanik pinerliisimanginnermut uppersaatit immersugassartaat immersoriikkat Naalagaaffiup Politiivinut faxikkut nassiunneqarsinnaasut. Ilutigisaanik Inatsisinik Atuutsitsinermut Ministeeriaqarfiup nalunaarutigaa, 31. marts 2014-imiit meeqqanik pinerliisimanginnermik uppersaatit digitalimik piniarneqarsinnaasimasut, NemId atorlugu. Taamaassappalli piumasaavoq sulisup elektroniskimik atsiornera imaluunniit suliffiup NemId-qarnera aamma suliffiup, oqartussaqaarfiup peqatigiiffiulluunniit digitalimik allagarsiisarfianut isersinnaanissaq. Aammattaaq ilanngunneqassaaq pisortani sulisitsisut arlallit maanna pinerluuteqarsimanginnermik uppersaatinik pisortatigoortunik taaneqartartunik piniarsinnaareermata inunnut pineqartunik sulialinnut tunngatillugu, taakkualu siunissami meeqqanik pinerliisimanginnermut uppersaatinik taarserneqarsinnaassammata.

4. Inuutissarsiutinik ingerlatsisunut aningaasatigut kingunerisassai

Meeqqanik pinerliisimanginnermut uppersaateqartitsisarnerup annertusinera assersuutigalugu peqatigiiffinnut, suliffeqarfinnut, kattuffinnut il.il. namminerisamik ingerlatsinermi inatsisinik tunngaveqartunut aningaasartuuteqarfiussasoq naatsorsuutigineqarpoq, taakkununga ilanngullugit suliffeqarfiit imminnut pigisut meeqqanillu orninneqartartut. Aningaasartuutit immikkoortoq 3-mi taaneqartunut aningaasartuutitut tunngassapput, tassalu piffissamat suliffimmut nassitsinermilu aningaasartuutitut. Kisianni inuutissarsiutinik ingerlatsisunut aningaasartuutit annertunissaat naatsorsuutigineqanngilaq, pissutigalugu suliffiit, peqatigiiffiit il.il. taakku amerlanersaat inatsit atuuttoq tunngavigalugu sulisuminnut atatillugu meeqqanik pinerliisimanginnermut uppersaatinik piniareersimassammata, tassami suliffinni taamaattuni sulisut amerlanersaat tassaapput toqqaannartumik meeqqanik suliaqartartut. Tamatumunnga ilanngunneqassaaq

suliffiit namminerisamik ingerlatsinermi inatsisinik tunngaveqarlutik suliaqartut amerlangitsuinnaat meeqqanik suliaqartarmata.

5. Avatangiisinut, pinngortitamut peqqissutsimullu kingunerisassai.

Inatsisissatut siunnersuut avatangiisinut pinngortitamullu kinguneqassanngilaq.

6. Innuttaasunut kingunerisassai

Inatsisissatut siunnersuutip nassatarissavaa innuttaasut sumiiffinnut meeqqat tikittagaannut atorfininnissamik sulilernissamilluunniit qinnuteqartut, atorfininnginnerminni sulilinnginnerminniluunniit meeqqanik pinerliisimannginnermut uppernarsaammik piniartoqarnissaa akuereqqullugu qinnuigineqassammata. Aammattaaq naatsorsuutigineqarpoq siunnersuutip nassatarissagaa meeqqat 15-it inorlugit ukiullit kinguaassiuutitigut atonerlunneqarnissamut illersugaanerulernerat. Ilutigisaanik siunnersuutip nassatarissavaa, meeqqanik pinerliisimannginnermut uppernarsaatit piniarneqartassammata inunnut tamanut siunnersuutip atuutilernerata kingorna assersuutigalugu angajoqqaarsiaasunut imaluunniit angerlarsimaffimmi paarsisartunut nuuttunut.

7. Kingunerisassat pingaarutillit allat

Naalagaaffeqatigiinnermut imaluunniit Namminersorluni Oqartussaanerup ingerlaqqinneranut naleqqiullugu inatsisissatut siunnersuut kinguneqassanngilaq, kisiannili Naalagaaffimmi Oqartussaasut qanimut suleqatigiuarmissaat pisariaqarpoq, Pinerluuteqarsimasunik Qitiusumik Nalunaarsuiffik taakku oqartussaaffigimmassuk.

8. Pisortanut kattuffinnullu tusarniaaneq

Inatsisissatut siunnersuut 30. maj 2014-imiit 4. juli 2014-imut ukununnga tusarniaassutigineqarpoq. Oqaatigineqassaaq kommunit KANUKOKA-llu – KANUKOKA-p qinnuteqarnerata kingorna – tusarniaanermut piffissaliussaq 4. August 2014-imut kinguartimmassuk:

Naalackersuisut siulittaasuata naalackersuisoqarfia

Ineqarnermut naalackersuisoqarfiusimasoq

Pinngortitamut Avatanngiisinullu naalackersuisoqarfiusimasoq

Aningaasaqarnermut Nunamilu Namminermi Pissutsinut naalackersuisoqarfiusimasoq

Aalisarnermut, Piniarnermut Nunalerinermullu naalackersuisoqarfik

Inuussutissarsiornermut, Aatsitassanut Suliffeqarnermullu naalackersuisoqarfiusimasoq

Peqqissutsimut Attaveqarnermullu naalackersuisoqarfiusimasoq

Ilaqutariinnermut Inatsisinillu Atuutsitsinermit naalackersuisoqarfiusimasoq

Aatsitassanut Pisortaqaqarfiusimasoq

Inatsisinik atuutsitsinermit ministeariaqarfik

Kalaallit Nunaanni Sulisitsisut Peqatigiiffiat (GA)

SIK

NPK (Nunatsinni Perorsaasut Kattuffiat)

Nunatta Eqqartuussivia

MIO

KANUKOKA

KANUNUPE

ASG

DJØF

NUSUKA

IMAK

KNAPK

AK (Atorfillit Kattuffiat)

PK (Peqqissaasut)

PPK (sungiusaasut, juumuut, pillorissaasut, timimik sungiusaasut, bioanalytekerit)

SSK (Sulisunik Siulersuisut Kattuffiat)

Nunatta Atuagaateqarfia

Biskopip Allaffia

Provsteqarfik Avannaa

Provsteqarfik Qeqqa, Tunu Qaanaarlu

Provsteqarfik Kujataa

Grønlands Frikirke

Bahai

Jehovap Nalunaajaasui

Jesu Små Søstre

Ilagiit Katuullit

Ilagiit Apostolskiusut Nutaat

Kalaallit Nunaanni Timersoqatigiit Kattuffiat

Sorlak

NAPA

Silamiut

Katuaq

Taseralik

Kalaallit Nunaanni Spejderit

Nanu Børn

Meeqqat Inuunerissut

Mælkebøtten

MIPI

Kalaallit Nunaanni Rigsombudsmandi

Sullivinnik Nakkutilliisoqarfik

Inuit Pisinnaatitaaffii pillugit Instituti

Tusarniaanermut piffissaliussap naanerani ukunannga akissutit tiguneqarput:

Aningaasaqarnermut Nunamilu Namminermit Pissutsinut naalackersuisoqarfiusimasoq,

Aalisarnermut, Piniarnermut Nunalerinermullu naalakkersuisoqarfik, Inuussutissarsiornermut, Aatsitassanut Suliffeqarnermullu naalakkersuisoqarfiusimasoq, Peqqissutsimut Attaveqarnermullu naalakkersuisoqarfiusimasoq, Meeqqat Illersuisuat, Datatilsynet, IMAK, Bahai, Sulisitsisut Peqatigiiffiat (GA), Kultureqarnermut Ministeeriaqarfik, Mælkebøtten, NPK, PPK, Red Barnet, SIK, Inatsisunik Atuutsitsinermit Ministeeriaqarfik, Sullivinnik Nakkutilliisoqarfik, Kalaallit Nunaanni Politiit, Inuit Pisinnaatitaaffii pillugit Instituti, Kommune Kujalleq, Qeqqata Kommunia, Qaasuitsup Kommunia, KANUKOKA aamma Kommuneqarfik Sermersooq.

Inatsisunik Atuutsitsinermit Ministeeriaqarfiup aamma Kultureqarnermut Ministeeriaqarfiup siunnersuutigaa inatsisit oqaasertaat, Pinerluuteqarsimasunik qitiusumik nalunaarsuiffimmi inunnik paasissutissat suliarineqartarnerat pillugu nalunaarummi aalajangersakkanut naapertuuttunut naleqqussarneqassasut. Tamanna maleruarneqarpoq, oqaatsit assigiit atornissaat siunertaralugu, meeqqanillu pinerliisimannginnermut uppersaateqartitsisarnertut pillugit inatsisitigut paatsuungasoqalernissaa pinngitsoorumallugu.

Aammattaaq Red Barnet-ip innarluutilinnik sullissiviit § 3, imm. 1, nr. 2-mi pineqartut erseqqissarneqarnissaannik kissaataa maleruarneqarpoq. Aamma Kommune Kujallermiit tikkuarneqarpoq inatsimmut nalinginnaasumik oqaaseqaatini oqaatsip ”nalinginnaasumik” piunarsaatit atorneqarnera paatsuunganarsinnaasoq, suliffinnut meeqqat atuisutut ornittagaannut naleqqiullugu. Taamaammat taama allaqqanera oqaaseqaatinit peerneqarpoq.

Tassunga atatillugu tusarniaanermiit allakkiaq ilanngunneqartoq innersuunneqarpoq, tassani tusarniaanermut akissutit ataasiakkaat saqqummiunneqarmata.

Kiisalu oqaatigineqassaaq inatsisissanik nalileeqqissaartartut nalileereernerisa kingorna siunnersuut annikinnerusutigut allanngortinneqarmat, ilaatigut siunnersuutip atuutilerfissaanut tunngatillugu immikkoortup nutaap ilanngunneratigut erseqqissaasoqarluni. Tamatumaa ilutigisaanik aalajangersagaq inatsisilioriaaseq pissutigalugu nuunneqarpoq siunnersuummi § 3, imm. 1, nr. 1, naggat kingullermiit imm. 4-mut nutaamut, taamaalillunilu maannamut imm. 4-6 tassaalerlutik imm. 5-7.

Inatsisissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Aalajangersagaq meeqqanik pinerliisimannginnermut uppersaateqartitsisarnertut atuuttup annertusinissaanik inatsisissatut siunnersuutip pingaarnertut siunertaata nassatarivaa, taamaalilluni inatsisip atuuttup atuuffii assinganik annertusissallutik. Ilutigisaanik

aalajangersakkap nassataraa Inatsisartut inatsisaanni atuuttumi § 1-ip inuit atorfitsik suliffitsilluunniit pissutigalugu meeqqanut 15-it inorlugit ukiulinnut toqqaannartumik attaveqartussat meeqqanik pinerliisimanginnermut uppersaammik kisimik piniunneqannginnissaat pillugu aalajangersakkamik ilassuteqartoqarnera. Taamaalilluni aalajangersagaq atuuttoq ilaneqarpoq ima: ”amma inunnut sulinerminnut atatillugu meeqqat 15-it inorlugit ukiullit aalajangersimasumik akornanniittartunut, taamaalillutillu meeqqanut 15-it inorlugit ukiulinnut toqqaannartumik attaveqarsinnaasunut”.

Nr. 2-mut

Aalajangersagaq annerusumik tassaavoq Meeqqanik pinerliisimanginnermut uppersaatit piimasagaateqartussaataaneq pillugu Inatsisartut inatsisaanni nr. 8, 19. maj 2010-meersumi § 2, imm. 1-imi, naggatit siulliannik ingerlatitseqqiineq, kisiannili pinerluuteqarsimasut nalunaarsorsimaffiat pillugu nalunaarummi § 36-p allangortinnera naaportorlugit allangortinneqartoq, tassani meeqqanik pinerliisimanginnermut uppersaatit nassuiarneqarput. Allanguutip siunnersuummi nr. 1 tamatigut assigaa.

Soorlu nalinginnaasumik oqaaseqaatini eqqaaneqartoq, meeqqanik pinerliisimanginnermut uppersaatit allangortinnerata, siunissami inuit meeqqanut 15-it inorlugit ukiulinnut toqqaannartumik attaveqartussaangikkaluartut, kisiannili meeqqanik tikiqqartartuni atorfeqartussat sulisussalluunniit, ilanngullugit uppersaammik piniunneqartalissapput. Taamaalilluni tamanna amma atuuppoq, pineqartup atorfiata allaaserinerani meeqqanik attaveqartarnissaa ilaangikkaluarpalluunniit amma pineqartup meeqqanik suliaqartarnissaa ilimagineqanngikkaluarpalluunniit. Pisuni ataasiakkaani nalilertariaqarpoq, suliaq meeqqanut toqqaannartumik attaveqalernissamut periarfissaqarfiunersoq. Amma pineqartup suliaq apeqqutaassaaq, atorfimmini taaguutaa apeqqutaanani.

Aammattaaq aalajangersakkami ersippoq, pineqartup suliani suliarissagai aalajangersimasumik meeqqat akornanniissinnaalluni. Tamanna isumaqarpoq, pineqartoq sivikitsuinnarmik qaqutigootumillu meeqqamik takusaqartassappat imaluunniit sivikitsuinnarmik meeqqanut attaveqartarpat, meeqqanik pinerliisimanginnermut uppersaateqarnissaq pisussaaffiqeqassanngitsoq. Apeqqutaasoq tassaavoq pineqartoq aalajangersimasumik meeqqat akornanniittarnersoq, tassuunakkullu tatigeqatigiinnermik pilersitsisinnaalluni, aammattaaq aalajangersakkap isummerfiginngilaa pineqartoq ilumut meeqqanut 15-it inorlugit ukiulinnut toqqaannartumik attaveqarnissamut periarfissaminik atuinersoq. Aalajangersakkap nassataraa ullumikkut meeqqat najuuffigisartagaanni suliat, meeqqanut 15-it inorlugit ukiulinnut toqqaannartumik attaveqartussaanginneq pissutigalugu meeqqanik pinerliisimanginnermut uppersaateqartussaanerup avataanniittut, siunissami meeqqanik pinerliisimanginnermut uppersaateqarfiusussanut ilaalissammata. Tamatumani assersuutigalugu pineqarsinnaapput timersortarfinni nakkutilliisut, pedelit, suliffinni meeqqat 15-it inorlugit ukiullit ornittagaanni asaasut igaffimmiullu.

Aamma ilanngunneqassaaq, piimasaammat pineqartup atorfirmut suliffimmulluunniit aalajangersimasumik attuumassuteqarnissaa, tamannalu inatsimmi atuuttumi § 3, imm. 4-mi ersippoq. Taamaammat tamanna pillugu piimasaqaatinut tunngatillugu inatsimmi atuuttumi § 3, imm. 4 tassungalu oqaaseqaatit innersuunneqarput. Taamaalilluni suli piimasaqaataavoq atorfilik imaluunniit sulisoq oqartussaasunut, suliffimmut, peqatigiiffimmut il.il. pineqartumut aalajangersimasumik attuumassuteqassasoq, meeqqanik pinerliisimanginnermut uppersaammik piniarnissaaq pisussaaffiulissappat.

Nr. 3-mut

Aalajangersagaq una, atuakkanik atorniartarfiit maanna atorfinitsitsisartut, meeqqanik atorfeqartut sulisullu sulinerminni meeqqat 15-it inorlugit ukiullit akornanniittartut pinerliisimanginnermut uppersaatinik piniussisartussatut ilanngunneqarnissaannik siunnersuutip kinguneraa.

Nr. 4-mut

Aalajangersakkap nassataraa siunissami kommunalbestyrelsit aammattaaq pisussaaffigissammasuk kommunimi atuakkanik atorniartarfinni sulisut meeqqanik pinerliisimanginnermut uppersaatinik piniunneqartarnissaat, taakku sulinerminnut atatillugu aalajangersimasumik meeqqat akornanniittartussaatiillugit. Ilutigisaanik oqaatigineqassaaq, atuarfinni atuakkanik atorniartarfiit aalajangersakkamut ilaareermata, tassami taakku inatsisimmi atuuttumi § 3, imm. 1, nr. 1-imi meeqqat atuarfiinut eqqaaneqartunut ilaapput.

Nr. 5-imut

Aalajangersagaq allanngortinneqarpoq ”katersugaasiviit aamma Nunatta Atuagaateqarfia” ilaalersillugit. Aalajangersagaq siunnersuutip pingaarnertut siunertaanut attuumavoq, tassalu suli at imminnerminni meeqqanut 15-it inorlugit ukiulinnut toqqaannartumik attaveqarfiusangikkaluartut, kisiannili meeqqat 14-it inorlugit ukiullit akuttunngitsumik ornittagaanni suliffiusut ilaatinneqalernissaannik siunertaqarneq. Pingaaruteqartoq tassaavoq inuit suliffinni taakkunani sulisut, meeqqanut 15-it inorlugit ukiulinnut tatigeqatigiinnermik pilersitsisinnaanerit.

Nr. 6-imut

Aalajangersakkami siunertaavoq, angerlarsimaffimminni suliffeqartunut atatillugu innarliisoqarsinnaanerani pinaveersaartitsinissaaq. Aalajangersakkami ersarissumik pineqarpoq, atorfillip sulisulluunniit nammineq angerlarsimaffimmini sulinera. Pisuni taamaattuni atorfeqartup aappaa, inooqataa, najugaqataa, innissimasua imaluunniit meerai angerlarsimaffimminni najugaqartut, meeqqat ilagalugit angerlarsimaffimmiissinnaapput, taamaalillutillu toqqaannartumik meeqqanut attaveqarnissaminnut periarfissaqarlutik tatigeqatigiinnermillu pilersitsisinnaallutik. Aamma meeqqamik paarsisuusup ilaanneeriarluni

meeraq assersuutigalugu aapparminut, inooqatigisaminut imaluunniit meeqqaminut angajullernut paaritittarsinnaavaa, assersuutigalugu nammineq nakorsiarniaruni il.il. Allatut oqaatigalugu nammineq angerlarsimaffimmi paarsinerup nassatarisinnaavaa, illoqatit qanimut meeqqanut nakkutigineqanngitsumik attaveqarnerat.

Illoqatigisat meeqqanik pinerliisimannginnermut uppersaatinik piniunneqartussat ukiuinik killiliinermut tunngatillugu eqqaaneqassaaq, tamatumani soorunami aallaaviummat, meeqqanik pinerliisimannginnermut uppersaateqartussat pineqaatissinneqarsinnaanermut ukiut killingi qaangersimasariaqarmatigit.

Nuuttoqarnerani meeqqanik pinerliisimannginnermut uppersaatinik piniartoqarnissaanik piunasaqaat ima paasineqassaaq, inuit 15-it sinnerlugit ukiullit meeqqap paarineqalereernerata kingorna illoqatigiinnut nuuttut aammattaaq meeqqanik pinerliisimannginnermut uppersaatinik piniunneqassasut.

Tamatumunnga atatillugu, inuit pineqaatissinneqarsinnaanermut ukiut killingi qaangerlugit ukiullit assersuutigalugu angajoqqaarsiaasartunut nuuttut meeqqanik pinerliisimannginnermut uppersaammik piniunneqarnissaat kommunalbestyrelsip akisussaaffigaa. Inissiinermut atatillugu aammattaaq kommunalbestyrelsip piunasarisinnaavaa nuuttoqartillugu kalerrinneqartarnissani.

§ 2-mut

Siunnersuutigineqarpoq Inatsisartut inatsisaat atuutilissasoq 1. august 2015.

Siunnersuut siunissami atuuttussatut siunertaqarmat, siunnersuutip atuuffiata annertusinera, inunnik meeqqanut 15-it inorlugit ukiulinnut toqqaannanngikkaluamik attaveqartartunik meeqqanik pinerliisimannginnermut uppersaateqartitsisarnermut ilaalersitsisoq, taamaallaat inunnut inatsisissatut siunnersuutip atuuttuulerfiata kingornagut atorfinitsinneqartunut sulilersinneqartunulluunniit atuutissaaq.

Aalajangersakkami imm. 2-mi erseqqissarneqarpoq, inuit 15-it sinnerlugit ukiullit assersuutigalugu angajoqqaarsiaasartuni imaluunniit angerlarsimaffimmi paarsisartuni inatsisip atuuttuulernerata kingorna najugaqalerlutik nuuttut, meeqqanik pinerliisimannginnermut uppersaammik piniunneqassammata, meeqqamik paarsaqarnerup qaqugukkut aallartissimanera apeqqutaatinnagu.